

ZAPISNIK

sa 9. Tematske sjednice Gradskog vijeća Bihać održane 23.04.2021. godine, (petak) s početkom rada u 10:00 sati u Gradskoj vijećnici Grada Bihaća

Zamjenik predsjedavajućeg, Asmir Budimlić, otvara sjednicu Gradskog vijeća i konstatira da je na sjednici prisutno 22 vijećnika.

Za današnju tematsku sjednicu Gradskog vijeća, Asmir Budimlić, zamjenik predsjedavajućeg predlaže sljedeći:

Dnevni red

- Informacija o poduzetim aktivnostima u vezi Zaključaka sa 4. Tematske sjednice Gradskog vijeća Bihać, održane dana 04.02.2021.godine

Zamjenik predsjedavajućeg daje predloženi dnevni red na usvajanje.

Dnevni red je usvojen jednoglasno sa 22 glasa „ZA“

Zamjenik predsjedavajućeg Asmir Budimlić prezentirao je Zaključke koji su doneseni na 4. Tematskoj sjednici održanoj 04.02.2021.godine, te analizirao realiziranost donesenih zaključaka kako slijedi:

1. Gradsko vijeće Bihać traži od osnivača ZU Dom zdravlja Bihać da donese odluku o izgradnji novog objekta ZU Dom zdravlja Bihać, za potrebe osiguranja higijene i zdravlja građana grada Bihaća.

Zamjenik predsjedavajućeg konstatira da zaključak nije realiziran od strane Vlade i Skupštine USK-a

2. Traži se od Vlade Unsko - sanskog kantona da pokrene proceduru prenosa primarne zdravstvene zaštite sa nivoa Kantona na općine i gradove Unsko- sanskog kantona.

Zamjenik predsjedavajućeg konstatira da zaključak nije realiziran od strane Vlade i Skupštine USK-a

3. Traži se od Vlade Unsko-sanskog kantona da u roku od 15 dana od dana održavanja tematske sjednice Gradskog vijeća, obezbijedi adekvatan i uslovan prostor u koji se mogu prostorno smjestiti sve službe ZU Dom zdravlja Bihać, kako bi 60 000 građana grada Bihaća imalo potpuni pristup primarnoj zdravstvenoj zaštiti. Predlažemo da prioritet pri odabiru imaju objekti u državnom vlasništvu.

Zamjenik predsjedavajućeg konstatira da zaključak nije realiziran od strane Vlade i Skupštine USK-a

4. Vizuelnim pregledom objekta, naknadnim snimanjem deformacija i slijeganja konstrukcije objekta utvrđena su i evidentirana brojna narušavanja mehaničke otpornosti objekta, a kako su mogući i novi potresi, Gradsko vijeće Bihaća, u cilju zaštite 260 zdravstvenih i drugih zaposlenika i pacijenata, traži kontinuiranu aktivnost Vlade Unsko sanskog kantona.

Zamjenik predsjedavajućeg konstatira da Kolegij GV-a nema zvaničnu informaciju o poduzetnim aktivnostima

5. Traži se od ZU Dom Zdravlja Bihać da u skladu sa zakonom propisanom procedurom u što kraćem roku izabere ovlašteni institut/firmu/vještake koji će u skladu sa pravilima struke uraditi detaljnu seizmičku analizu stanja objekta odnosno analizu mehaničke otpornosti, stabilnosti, sigurnosti i funkcionalnosti objekta kao i pripadajućih instalacija na osnovu čega će dati konačnu procjenu stanja objekta sa konačnim zaključkom - rušenje ili rekonstrukcija objekta. U slučaju rekonstrukcije objekta traži se sveobuhvatna rekonstrukcija, kako bi se objekat mogao iskoristiti za smještaj institucija vlasti i drugih institucija USK-a.

Zamjenik predsjedavajućeg konstatira da je zaključak realiziran, ali izvještaj još nije dostavljen gradu Bihaću

6. Zaključak je bio konstatacija

7. Gradsko vijeće Bihać ovlašćuje Gradonačelnika da formira radno tijelo čiji će zadatak biti da sagleda potencijalne lokacije za izgradnju nove zgrade, prioritarno imajući u vidu mogućnosti izgradnje u krugu Kantonalne bolnice „dr.Irfan Ljubijankić“. Stručni tim će u što kraćem roku pripremiti urbanističko tehničke uslove, izdati lokacijsku informaciju i građevinsku dozvolu za izgradnju novog objekta. Imenovani tim će također voditi sve aktivnosti u pripremnim radnjama vezanim za izgradnju novog objekta.

Zamjenik predsjedavajućeg konstatira da je zaključak realiziran

8. Vođeni negativnim iskustvom dodjele 4.000.000,00 KM od strane Vlade FBiH na račun Vlade Unsko - sanskog kantona, od kojih Grad Bihać nije dobio nijednu konvertibilnu marku, traži se od Vlade Unsko - sanskog kantona da se otvori poseban namjenski račun na koji će se prikupljati sredstva za izgradnju nove zgrade ZU Dom zdravlja Bihać.

Zamjenik predsjedavajućeg konstatira da zaključak nije realiziran od strane Vlade i Skupštine USK-a

9. Zaključak je bio konstatacija

10. Gradsko vijeće Bihaća cijeni zalaganje Vlade Federacije BiH i pojedinih predstavnika vlasti iz Bihaća na svim nivoima za rješavanje ovog problema i traži da se izabrani zvaničnici sa područja grada Bihaća na svim nivoima vlasti aktivno uključe u proces izgradnje novog objekta ZU Dom zdravlja Bihać.

Zamjenik predsjedavajućeg konstatira da je zaključak realiziran

11. Gradsko vijeće Bihaća traži od Skupštine Unsko-sanskog kantona da hitno održi tematsku sjednicu na kojoj bi se razmatrala problematika u vezi izgradnje novog objekta ZU Dom zdravlja Bihać i da po uzoru na aktivnosti člana Skupštine USK, koji je i delegat u Domu naroda Federacije BiH, povede aktivnosti u cilju obezbjeđenja sredstava za izgradnju novog objekta.

Zamjenik predsjedavajućeg konstatira da zaključak nije realiziran od strane Vlade i Skupštine USK-a

12. Gradsko vijeće Bihać traži od Gradonačelnika da u roku od 3 dana od dana održavanja tematske sjednice, dostavi Vladi Unsko-sanskog kantona ime i prezime dipl.ing. građevine, koji će ući u sastav koordinacionog tijela Vlade Unsko-sanskog kantona u vezi izgradnje novog objekta ZU Dom zdravlja Bihać.

Zamjenik predsjedavajućeg konstatira da je zaključak realiziran

Zamjenik predsjedavajućeg naglašava da su ovo stavovi Kolegija Gradskog vijeća, koji čine stranke koje participiraju u Vijeću, a u skladu sa Poslovníkom.

Zamjenik predsjedavajućeg je upoznao vijećnike da su, u cilju dobijanja relevantnih informacija, na današnju sjednicu pozvani sljedeći gosti:

- Premijer Unsko-sanskog kantona
- Ministrica zdravstva i socijalne politike USK-a
- Direktor Doma zdravlja Bihać
- Hamdija Abdić, poslanik SDA u Parlamentu Federacije BiH
- Albin Muslić, poslanik u SDP u Parlamentu Federacije BiH
- Azra Hadžić, poslanik SBB u Parlamentu Federacije BiH
- Hadis Jusić, delegat SDA u Domu naroda Federacije BiH i poslanik u Skupštini USK-a
- Zikrija Duraković, poslanik PoMAK-a u Skupštini USK-a
- Fatka Kulenović, poslanik SDP-a u Skupštini USK-a
- Irma Dedić, poslanik A-SDA u Skupštini USK-a

- Vildana Alibabić, poslanik Naše stranke u Skupštini USK-a
- Ilda Alibegović, poslanik Naroda i pravde u Skupštini USK-a
- Predstavnik firme „Euroing“ d.o.o. Bihać

Zamjenik predsjedavajućeg poziva predstavnika firme d.o.o. Euroing Bihać, Grozdanić Samira da se prvi obrati vijećnicima i prezentira konačan građevinski nalaz o stabilnosti, sanaciji i izgradnji objekta Doma Zdravlja Bihać.

Predstavnik firme d.o.o. Euroing., Samir Grozdanić, izložio je vijećnicima građevinski nalaz sa aspekta stručne procjene po Projektnom zadatku koji su dobili od Vlade USK-a, i to kroz tri poglavlja:

- Pregled stabilnosti i troškova sanacije objekta Doma zdravlja Bihać
- Vraćanje konstrukcije Doma zdravlja u stanje prije potresa
- Izgradnja novog objekta Doma zdravlja Bihać.

Ekrem Tutić – predstavnik strukovnog sindikata, u svom obraćanju, između ostalog, naglasio je da su zdravstveni radnici maksimalno opterećeni i izloženi pritisku kako sigurnosnom, tako i epidemiološkom i egzistencijalnom.

Adnan Alagić, ministar za građenje, prostorno uređenje i zaštitu okoliša USK-a

Između ostalog, naglasio je da će Vlada USK-a podržati konačnu odluku menadžmenta Doma zdravlja u pogledu izgradnje ili rekonstrukcije objekta. Također, ističe da neće Vlada USK-a imati namjenski račun, odnosno da će novčana sredstva za sanaciju ili izgradnju Doma zdravlja, Vlada USK-a prenositi na račun Doma zdravlja, a sa kojima će upravljati Upravni odbor i direktor zdravstvene ustanove.

Muris Halkić, ministar zdravstva i socijalne politike,

Između ostalog, naglasio je da je prioritet stvoriti prihvatljive uslove za rad Doma zdravlja, kako za zdravstvene radnike, tako i za stanovništvo grada Bihaća, obzirom da će sanacija ili izgradnja trajati minimalno dvije godine.

Azra Hadžić, poslanik SBB u Parlamentu Federacije BiH

U svojoj diskusiji izražava nepovjerenje i krajnju sumnju u riječi ministra za građenje USK-a, te ističe da većina nema povjerenja u njegove riječi. Zato poziva federalne zastupnike da je podrže u Inicijativi kako bi se od iznosa od 25 miliona namijenjenih za Aerodrom Bihać na rebalansu preusmjerila sredstva za izgradnju Doma zdravlja Bihać.

Hadis Jusić, delegat SDA u Domu naroda Federacije BiH i poslanik u Skupštini USK-a

U svojoj diskusiji je naglasio da je izgubljeno vrijeme, jer svi ističu da se znalo da će se morati graditi novi objekat, pa se pita, zašto se čeka da prođe građevinska sezona, zašto se nije krenulo u izgradnju.

Albin Muslić, poslanik SDP u Parlamentu Federacije BiH

U svojoj diskusiji je pozvao Upravni odbor i menadžment Doma zdravlja nakon što donesu konačnu odluku o sanaciji ili izgradnji objekta, da obavijeste sve nivoe vlasti, a svoje kolege je zamolio da tada bez politike i političkih poena daju doprinos u rješavanju Domu zdravlja.

Hamdija Abdić, poslanik SDA u Parlamentu Federacije BiH

Između ostalog, osvrnuo se na uvjete rada zdravstvenih radnika koji traju od prije četiri mjeseca, te naglasio da će Federacija BiH pored 3.000.000,00 KM za Dom zdravlja izdvojiti i dodatna sredstva, ali da nije zadovoljan sa osnivačem, koji je već trebao pokrenuti projekat izgradnje zdravstvene ustanove.

Fatka Kulenović, poslanik SDP-a u Skupštini USK-a

Mišljenja je da nam u ovom trenutku nije potrebna podijeljenost, potrebno je jedinstvo kada je u pitanju Dom zdravlja Bihać, te da svi zajedno moraju dati svoj doprinos, kako za zdravstvene radnike Doma zdravlja, tako i za građane grada Bihaća.

Zikrija Duraković – poslanik PoMAK-a u Skupštini USK-a

Između ostalog traži da se prioritetno pomogne na uslovima rada zdravstvenih radnika, odnosno da se nađe adekvatan poslovni prostor za službe Doma zdravlja, kako bi se službe stavile u punu funkciju na zadovoljstvo građana.

Vildana Alibabić – poslanik Naše stranke u Skupštini USK-a

Istakla je da sve procedure vezane za rješavanje problema sa Domom zdravlja dugo traju, što nije dobro za građane grada Bihaća. Ističe da će kao svoj doprinos predložiti Skupštini USK-a na narednoj sjednici inicijativu kojom bi se angažirao Radio Bihać da dnevno informiše građane o rasporedu rada pojedinih ordinacija u sklopu Doma zdravlja Bihać.

Ademir Jusufagić – direktor Doma zdravlja Bihać

U svom obraćanju upoznao je prisutne o poduzetim mjerama u cilju organiziranja pojedinih službi u ZU Dom zdravlja Bihać.

Ilda Alibegović – poslanik Naroda i pravde u Skupštini USK-a

Između ostalog, nada se da će se svi prisutni vratiti cilju zbog kojeg su se okupili, te smatra da su svi nivoi vlasti poduzeli sve što je u njihovoj moći za rješavanje problema vezanog za Dom zdravlja, ali se moraju ispoštovati propisani rokovi za donošenje konačnih odluka, kada je u pitanju sanacija ili izgradnja objekta.

Irma Fatkić – poslanik A-SDA u Skupštini USK-a

Između ostalog smatra da je danas trebao biti prisutan Upravni odbor Doma zdravlja, te pita organizatora ove tematske sjednice zašto oni nisu pozvani, kako bi iznijeli svoj stav, odnosno svoje aktivnosti oko rješavanja problema zdravstvene ustanove kojom upravljaju.

Nakon izlaganja gostiju, zamjenik predsjedavajućeg Gradskog vijeća, daje riječ Gradonačelniku grada Bihaća, a zatim i vijećnicima po redosljedju onako kako su se prijavili za diskusiju.

Šuhret Fazlić – Gradonačelnik grada Bihaća

Zahvaljuje se svima koji su izdvojili vrijeme za dolazak na današnju sjednicu i traži od svih prisutnih da se bore za svoj Grad. Ističe svoj motiv za današnju sjednicu, a to je da Skupština USK-a osigura finansijska sredstva u iznosu od 6-7.000.000,00 KM na posebnom računu za izgradnju Doma zdravlja.

Vijećnik Emir Mujadžić

Između ostalog, ističe da se prvo treba riješiti građevinska parcela i Idejno rješenje za Dom zdravlja, pa zatim namjenski račun za finansiranje izgradnje.

Vijećnik Elvedin Sedić

Između ostalog, ističe da je najvažnije pitanje organizacija primarne zdravstvene zaštite, koja nije još adekvatno riješena, te da treba inzistirati na namjenskim finansijskim sredstvima za izgradnju Doma zdravlja.

Vijećnica Šeherzada Delić

Između ostalog, istaknula je da sav novac koji se spominjao na današnjoj sjednici nije operativan, pošto nema dokumentacije na osnovu koje bi se zatražilo otvaranje namjenskog računa za izgradnju Doma zdravlja. Također je naglasila da se mora naći bolje rješenje kako bi se obezbijedili uslovi za rad i funkcionisanje ZU Dom zdravlja Bihać.

Zamjenik predsjedavajućeg Gradskog vijeća se zahvalio svim gostima, te predložio pauzu do 14.00 sati koja je jednoglasno prihvaćena.

Nakon pauze gosti se nisu vratili u Vijećnicu na Tematsku sjednicu.

Vijećnica Maja Uremović

Istakla je da su građani, odnosno pacijenti u najtežem položaju, jer teško dođu do neophodnih medicinskih usluga u Domu zdravlja Bihać, pošto još nije adekvatno riješena organizacija.

Vijećnik Sulejman Kulenović

U svojoj diskusiji je iznio mišljenje, da se obzirom na broj stanovnika treba izgraditi Poliklinika u krugu Kantonalne bolnice i dva Doma zdravlja, jedan na Ozimicama i jedan u Prekounju

Vijećnik Halil Bajramović

Između ostalog, predložio je da vijećnici izglasaju, da se naknada za ovu sjednicu uplati na račun Doma zdravlja Bihać, zatim je naglasio da treba graditi novi Dom zdravlja, pošto je postojeći objekat već bio za sveobuhvatno renoviranje i bez potresa.

Vijećnik Armin Amidžić

Između ostalog, istakao je da ni nakon četiri mjeseca nije organizirana primarna zdravstvena zaštita, zatim je izrazio sumnju u namjere Kantonalne Vlade da riješe problem Doma zdravlja, te je ponudio Vladi USK-a pomoć u preraspodjeli sredstava za izgradnju objekta Doma zdravlja Bihać.

Vijećnica Lejla Bakrač

Između ostalog, izražava sumnju u namjere Kantonalne Vlade da rješavaju probleme u organizaciji primarne zdravstvene zaštite, te traži da obezbijede sredstva u Kantonalnom Budžetu za izgradnju Doma zdravlja.

Vijećnik Edin Felić

U svojoj diskusiji je istakao da se za ova četiri mjeseca ništa nije uradilo u vezi organizacije primarne zdravstvene zaštite i u vezi obezbjeđenja finansijskih sredstava za izgradnju nove zgrade Doma zdravlja. Poziva sve Bišćanke i Bišćane, na svim nivoima vlasti da se uključe u rješavanje Zaključaka koji će biti doneseni na ovoj sjednici Gradskog vijeća Bihać.

Vijećnik Adnan Lipovača

U svojoj diskusiji, podržao je vijećnika Bajramović Halila da se izglasa prijedlog, kako bi se naknada za današnju sjednicu uplatila na račun Doma zdravlja. Također je naglasio da treba izgraditi novu zgradu Doma zdravlja, te od nadležnih institucija zatražio da u što kraćem roku pronađu alternativni prostor za smještaj službi Doma zdravlja na drugoj lokaciji.

Vijećnik Asmir Budimlić

Između ostalog je naglasio da građani Bihaća ne mogu prolaziti kroz koridor da bi ušli u Dom zdravlja, da je potrebno hitno rješavanje sanacije objekta i organizacije rada Doma zdravlja, a u cilju pružanja primarne zdravstvene zaštite građanima.

Vijećnik Alen Zulić

U svojoj diskusiji, podržao je vijećnike u dosadašnjoj raspravi. Također traži da Kantonalna Vlada hitno riješi problem i odredi adekvatan objekat kako bi funkcionisala primarna zdravstvena zaštita.

Nakon iscrpljenih rasprava, **zamjenik predsjedavajućeg** zatvara raspravu, te objavljuje pauzu od 10 minuta.

Nakon pauze, **zamjenik predsjedavajućeg** Asmir Budimlić iznosi usaglašene zaključke sa današnje tematske sjednice, svih stranaka koje participiraju u Vijeću, i to:

ZAKLJUČCI

1. Gradsko vijeće Bihać dijeli zabrinutost građana Grada Bihaća, zaposlenika, zdravstvenih radnika i pacijenata ZU „Dom zdravlja Bihać“ zbog loše organizacije primarne zdravstvene zaštite u Gradu Bihaću i neadekvatne reakcije Vlade i Skupštine Unsko-sanskog kantona, te daje punu podršku zaposlenicima ZU „Dom zdravlja Bihać“ i cijeni njihova zalaganja u obavljanju posla jer je evidentno da rade u neadekvatnim uslovima.
2. Gradsko vijeće Bihać traži od Vlade Unsko-sanskog kantona da u roku od 15 dana obezbijedi adekvatan i uslovan prostor za smještaj svih službi ZU "Dom zdravlja Bihać" u skladu sa propisanim standardima, kako bi 60.000 građana Grada Bihaća

imalo potpun pristup primarnoj zdravstvenoj zaštiti. Prioritet pri odabiru moraju imati objekti u državnom vlasništvu.

3. Prema mišljenju nosioca izrade konačnog izvještaja o pregledu objekta ZU „Dom zdravlja Bihać“, firme Euroing d.o.o. Bihać, troškovi sanacije postojećeg objekta procjenjuju se na iznos od 6.410.000,00 KM sa PDV-om, što podrazumijeva uklanjanje (rušenje) 2.340,00 m² postojećeg objekta, dok se izgradnja novog objekta površine 5.000 m² procjenjuje na iznos od oko 7.500,00 KM sa PDV-om. U skladu sa navedenim procjenama, Gradsko vijeće Bihać cijeni da je izgradnja novog objekta ZU „Dom zdravlja Bihać“ ekonomski opravdanija.
4. Gradsko vijeće Bihać traži od Vlade USK-a da prije donošenja konačne odluke o izgradnji novog objekta ZU „Dom zdravlja Bihać“ izvrši reviziju elaborata o pregledu stanja objekta ZU „Dom zdravlja Bihać“.
5. Gradsko vijeće Bihać traži od Vlade USK-a, da kao osnivač ZU „Dom zdravlja Bihać“ donese Odluku o izgradnji i odredi lokaciju za izgradnju novog objekta za potrebe ZU „Dom zdravlja Bihać“ u roku od 15 dana.
6. Vođeni negativnim iskustvom dodjele 4.000.000,00 KM od strane Vlade FBiH za ublažavanje posljedica migrantske krize na račun Vlade Unsko-sanskog kantona, od kojih Grad Bihać nije dobio nijednu konvertibilnu marku, Gradsko vijeće Bihać traži od Vlade FBiH da se doznaka namjenskih sredstva za izgradnju nove zgrade ZU "Dom zdravlja Bihać" vrši direktno na račun ZU "Dom zdravlja Bihać".
7. Gradsko vijeće Bihaća ponovno traži od Skupštine Unsko-sanskog kantona da hitno održi tematsku sjednicu na kojoj bi se razmatrala problematika u vezi izgradnje novog objekta ZU "Dom zdravlja Bihać", te da u Budžetu USK-a osigura ostatak sredstava neophodnih za izgradnju novog objekta.
8. Kako se Vlada Unsko-sanskog kantona kao osnivač ZU „Dom zdravlja Bihać“ do sada pokazala nefikasnom kada je u pitanju pravovremena reakcija u rješavanju krucijalnih problema koji su zadesili ustanovu od čijeg funkcionisanja ovise životi i zdravlje 60.000 građana Bihaća, Gradsko vijeće Bihać traži od Vlade Unsko-sanskog kantona da pokrene proceduru prenosa primarne zdravstvene zaštite sa nivoa Kantona na općine i gradove Unsko- sanskog kantona.
9. Gradsko vijeće Bihać traži od izabranih predstavnika vlasti iz Bihaća na svim nivoima da se aktivno uključe u realizaciju navedenih zaključaka i proces izgradnje novog objekta ZU „Dom zdravlja Bihać“.

10. Gradsko vijeće Bihać će poduzeti sve zakonom dozvoljene mjere u cilju realizacije donesenih zaključaka što uključuje i podršku protestima sindikata ZU „Dom zdravlja Bihać“.

Zamjenik predsjedavajućeg predložene zaključke daje na usvajanje.

Predloženi zaključci usvojeni su jednoglasno, sa 20 glasova „ZA“.

Zamjenik predsjedavajućeg zaključuje tematsku sjednicu održanu 23.04.2021.godine u 15 sati i 42 minute.

Zamjenik predsjedavajućeg Gradskog vijeća
Asmir Budimlić